



Persatuan Insurans Hayat Malaysia Life Insurance Association of Malaysia

Industri insurans hayat masih berupaya berkembang

KUALA LUMPUR: Industri insurans hayat tempatan dijangka mencatatkan mencapai pertumbuhan satu angka yang tinggi di sebalik keadaan ekonomi global dan tempatan yang tidak menentu akibat penularan COVID-19.

Ia diimbangi oleh kedudukan industri yang kukuh dan berdaya tahan di samping kadar penembusan insurans yang masih rendah di Malaysia.

Persatuan Insurans Hayat Malaysia (LIAM) dalam kenyataannya berkata,

industri insurans hayat mencatat kenaikan 14.19 peratus bagi jumlah premium perniagaan baharu kepada RM11.8 bilion tahun lalu berbanding RM10.3 bilion pada 2018, dipacu oleh peningkatan kesedaran mengenai kepentingan perlindungan insurans hayat dalam kalangan pengguna.

Dalam kenyataannya, persatuan itu berkata, perniagaan tradisi, perniagaan berkaitan pelaburan dan kumpulan turut mencatat pertumbuhan kukuh, masing-masing pada 30.12 peratus, 11.05 peratus dan 10.79 peratus.

Polisi baharu yang dikeluarkan pada 2019 merekodkan peningkatan 6.22 peratus kepada 1,315,233 polisi daripada 1,238,249 polisi pada 2018, di mana polisi berkaitan pelaburan terus menjadi produk popular pada 2019.

Jumlah perniagaan baharu yang diinsuranskan meningkat 6.91 peratus kepada RM483.4 bilion pada 2019 daripada RM452.1 bilion pada 2018.

"Jumlah purata yang diinsuranskan bagi kategori polisi individu (tidak termasuk insurans kumpulan) mencecah RM130,000 bagi setiap pemegang polisi.

"Ini bererti, setiap pemegang polisi mempunyai purata perlindungan insurans hayat sebanyak RM130,000 untuk melindungi keluarga mereka sekiranya kehilangan pencari nafkah," kata LIAM.

Presiden LIAM, Loh Guat Lan, bagaimanapun berkata, tahap perlindungan ini masih tidak mencukupi dan wujud jurang perlindungan yang luas dari segi perlindungan insurans yang diperlukan.

"Berdasarkan kajian yang dijalankan Universiti Kebangsaan Malaysia dan LIAM pada 2013, dianggarkan lima orang dalam satu keluarga memerlukan sekurang-kurangnya RM550,000 untuk perbelanjaan harian mereka bagi tempoh lima tahun akan datang sekiranya pencari nafkah meninggal dunia," katanya. - BERNAMA